

حديث الرئيس محمد انور السادات

في السويس في ٢٤ مارس ١٩٧٦

بسم الله

اخواني وأبنائي ابناء الجيش الثالث الميداني والقيادات السياسية
سعدت أعظم سعادة حقيقية وأنا في طريقى اليوم من المطار الى هنا ، لاننى شاهدت
بنفسى اعمال التعمير فى حيين جديدين بعد الحى الكبير : حى الملك فيصل . وحقيقة
سعدت اعظم سعادة حينما مررت فى طريقى اليكم فى شوارع السويس وكان مئات
الآلاف قد عادوا إلى السويس . سعدت اعظم سعادة وأنا أعلم انه لآزال هناك بعض
المهجرين من السويس لان كان نصيب السويس فى المعركة أكثر من شقيقاتها
الاسماعيلية وبور سعيد من جراء الغدر الاسرائيلى ولكنى أرجو ان يطمئن شعب
السويس الى أن كل ما يختص بالتعمير واعادة المهجرين وبناء الرخاء على ارض
السويس مرة اخرى هو فى الطريق اليهم لان تعليماتى فى هذا واضحة وهوقرار
سياسى والقرارات السياسية كقرار السد العالى تماما .. والقرارات السياسية بتأخذ
طريقها الى التنفيذ لانها لاتحتمل التأخير لانه ده وضع يمىس شعب السويس . الشعب
اللى تحمل ولايزال يتحمل جزء كبير منه مرارة الهجرة والألم ، والتمزق والهزيمة
الماضية ثم كان غدر العدو على السويس فى اقصى درجاته ، من أجل ذلك كان
التخريب فى السويس تقريبا

اكثر من ٨٠% أو ٩٠% سعدت اليوم وأنا أرى ان مدينة الاشباح اللى جيت زرتها
هنا يوم ماضرت الزيتية ردا على ضرب قواتنا البحرية لايلات فى اكتوبر ٦٧ ، لما
زرت السويس فى ذلك الوقت كانت مدينة أشباح وظلت أكثر من سبع سنوات بعد
ذلك مدينة أشباح الى أن بدأت الحياة تعود اليها بعد معركة ٧٣ ، ولكن أحمد الله أن
أبنائي مقاتلى الجيش الثالث الميدانى لاتتصوروا السعادة مبلغ سعادتى وانا أتفقد
مركز الرئاسة الاسرائيلى المواجه للسويس وبجانبه المدافع التى اعتدت على السويس

وضربت الزيتية ، وضربت السويس ولم يكن الاسرائيلين يعتقدون أبدا بإمكانية الوصول الى هذا الموقع مركز الرئاسة فى حوض الجبل الخلفى لا المدفعية تطوله ولا الطائرات تؤثر فيه وظنوا زى ماعدنا فى القرآن انهم مانعتهم حصونهم اتاهم أبناءى من الجيش الثالث وتركوا مركز القيادة كما هو بالكامل فروا بملابسهم فقط .. تركوا الخرائط تركوا كل شيء نذكر هذا وبسمعه لمصر ولأمتنا العربية كلها وللعالم لأنى سعيد لأنكم انتقمتم .. أبناءى أبناء أفراد الجيش الثالث انتقمتم للسويس وكشفتم الادعاء بتاع الجندى الاسرائيلى الذى لايقهر .. فروا القادة من مراكز القيادة بملابسهم فقط خرائط وكل شيء تركوه وتركوا أيضا المدافع التى ضربت السويس لكى يستولوا عليها أبناؤنا ولكى يحطموها كى لا تعود لتهديد السويس اوتهديد مصر مرة اخرى . شكرا لأبناءى مقاتلى الجيش الثالث شكرا لهم على هذا شكرا لهم . فى كبريت اسطورة نضال خالد أذكر وأنا فى غرفة العمليات فى ٦ اكتوبر وكانت تتوالى الأنباء سقوط النقط الحصينة . من خط بارليف التى على القناة ورفع العلم المصرى ثم مضينا فى المعركة الى أن كانت الثغرة .. وظن البعض اننا خسرنا المعركة بل انهارت أعصاب الكثيرين من الذين يجلسون فى القاهرة فى رفاهية القاهرة بالنسبة للميدان هنا انهارت اعصاب الكثيرون ، ولم تنهار أعصاب أبناءى أبدا ، بل سقطت كل النقط الحصينة ، كبريت استمرت أكثر من ١٢٠ يوما لم تسقط برغم كل الهجمات التى شنها العدو وكانت فى الشرق لم تسقط وانما ظلت صامدة الى أن حمل الاسرائيليون هزيمتهم على أكتافهم ورحلوا واليوم اهنتكم أيها الأبناء يا أفراد الجيش الثالث باتفاقية فض الاشتباك الثانى فقد تمت فى يوم ٢٢ فبراير الماضى وعاد الاسرائيليون خلف المضائق ولأول مرة أسمع شعبنا وأسمع العرب وأسمع العالم أجمع كانت خطتنا والهدف الذى أعطيته للقائد العام هو أن يطرد الاسرائيليون خلف المضائق بالاتفاقية الثانية تم تحقيق الهدف الكامل من المعركة المحدودة التى خططنا لها وانتصرنا فيها فى اكتوبر سنة ٧٣ تحدد نصرنا بفض الاشتباك الاول على الارض بقيمة ماحصلنا عليه وهنا لايد ان اذكر فى وقت من الاوقات فرقتين من

الجيش الثالث كانوا فى الشرق وفى وقت الثغرة جم اليهود وقفوا وراءهم ، وبعدين كان بقية الجيش الثالث بيواجه اليهود أيضا وطلعت زى ما حكيت لكم انهارت اعصاب البعض وللأسف الحقد أكل قلوب البعض وحاولوا وطبعا حاولت اسرائيل انها تعمل منها شيء لكن الحقيقة كانت أكبر لما جينا ناخذ الأرض بفض الاشتباك الاول نخطط على الأرض ما حصلت عليه قواتنا فعلا وقلت انا مكتفى بما حصلت عليه قواتنا لانه زى ما قلت كان واضح لى تماما ان الجميع بيتآمروا على انتصارنا لما جينا نخطط هنا امام الفرقتين اللى قالوا انهم فى حالة يرثى لها وحاول القذافى المريض انه يوجه لهم ويوجه للأمة العربية طعنات من الظهر لما جينا نخطط لقينا بدوى واخذ ارض اكثر مما حصل عليه فى معركة اكتوبر واتخطت هذه الارض للفرقتين بتوع الجيش الثالث اللى قالوا انهم كانوا عاجزين او كانوا محتجزين بأسمع انا العالم العربى وبأسمع مصر وبأسعد بيكم أيها الأبناء وانا بالتقى بيكم اليوم كل ما اذكر هذا لانه المسرحيات انتهت لا يصح الا الصحيح بعد فض الاشتباك الثانى جميع أهداف معركة ٧٣ تحققت بطرد اليهود خلف المضائق ودى كانت الخطة وكان الهدف اللى اعطيته للقائد العام فى امر القتال اللى وقعته يوم الثلاثاء قبل المعركة مباشرة كان يوم السادس او السابع من رمضان

باذكر هذا وانا بالتقى بكم اليوم وباذكر لما كانت السويس مدينة أشباح وباذكر ٦٧ ياولادى باذكر ان احنا لم نستسلم أبدا برغم كل أبعاد الهزيمة المريرة الأليمة اللى وقعت فى ٦٧ لم يمض أربعة شهور وفى ٢١ اكتوبر إلا وكانت بحريتنا المجيدة بتضرب لأول مرة فى تاريخ البحرية العالمية أول صاروخ على أكبر قطعة فى الاسطول الاسرائيلى وهى ايلات . ومنذ ذلك الوقت كتب التاريخ ان اول صاروخ فى تاريخ البحرية العالمية كان مصريا ألقاه المصريون وتغيرت استراتيجية الحرب البحرية بعد ذلك من القطع الكبيرة الى القطع الصغيرة لم نستسلم . ده كان بعد اربعة شهور فقط من هزيمة أليمة مريرة الأبعاد باذكر اخوانكم فى رأس العش والمعركة

المجيدة اللى عملوها فى وضح النهار والسبت الحزين اللى سموه كان يوم سبت سموه الاسرائيليين سموه السبت الحزين لأنهم خسروا على الضفة الشرقية كل (القول) الكبير اللى كان داخل علشان يوصل على الكيلو ١٠ ببضعة افراد من افراد القوات الخاصة ولادنا المصريين كل ده بافتكره وانا قاعد معاكم ياولادى النهارده وباقول لكم حاتظل مصر مدينة لكم وستظل الأمة العربية مدينة لكم .. للآداء الرائع .. التخطيط الرائع .. القتال الرائع . ظن اليهود انهم فى حصون وكانت منيعة . فعلا جيتم لهم من حيث لم يحتسبوا من خلفهم فخرجوا بملابسهم فقط دبابتهم اللى تركوها ، ولادنا ساقوها وجابوها كل ده حصل سنظل مصر مدينة لكم ياولادى وسيظل العرب مدينين لكم فى هذه اللحظة بحىي جميع شهدائنا شهداء الجيش الثالث وشهداء الجيش الثانى وشهداء جميع أفراد اسلحتنا أفرع القوات المسلحة باحبيهم باحبيهم واحنا بننتصر وانا وعدتكم ياولادى فى ٥ يونيو ٧٤ لما استعرضت الجيش الثالث بعد معركة ٧٣ هنا وعدتكم ان لاعودة الى الوراء وقد تمت اتفاقية فض الاشتباك الاولى وتمت اتفاقية فض الاشتباك الثانية . المرحلة المقبلة ان شاء الله هو الحل النهائى لتحرير سيناء والأرض العربية سنظل مدينين لكم ياولاد سيظل شعبكم مدين لكم ، وأمتكم العربية مدينة لكم ، بالمكان اللى تتبوأه النهارده . امتكم العربية القوة السادسة فى عالم اليوم . آداؤكم وتخطيطكم كان مصرى صرف ، وآداؤكم على أروع صورة . قتالكم مجيد .. لم يخطط لنا .. لمعركتنا حد .. وده كان وراء قرارى سنة قبل المعركة باخراج الخبراء السوفيت من مصر .. خطت القوات المسلحة .. ونفذت القوات المسلحة .. أدت القوات المسلحة أروع اداء ، لايمكن لاي مكابر ان ينكره اطلاقا ، بل ان الجميع العدووالصديق يحسب حسابكم اليوم ، كم كانت رقبتى بترتفع الى السماء قامات وانا اتفاوض مع الدكتور كيسنجر وفى ذهابه وفى عودته من اسرائيل كانت راسى بترتفع قامات لانه بينقل لى ايه اللى بيحسه الاسرائيلين من التخطيط المصرى .. القائد .. الجندى المصرى .. الآداء المصرى .. سنظل ياولادى سنظل ياأبنائى مدينين لكم .. شعبكم كله وامتكم العربية .. ولعل اخواننا فى سوريا

يعلموا ان كل ماتم من انجاز وروعة هنا هولهم ايضا .. لعلهم يقلعوا عن النزعات الحزبية الضيقة والمزايدات التافهة فكل نصر حصلنا عليه هو ايضا لهم .. نحن لانحقد على احد ولا نعتمد على الحقد كأسلوب للعمل أبدا .. من أجل ذلك خططنا .. قاتلنا .. نجحنا .. انتصرنا .. واليوم ذى مابحكى لكم مااحتجناش لمعركة اخرى علشان نحقق بقية أهدافنا لما دخلت امريكا ومنعتنى من تحقيق الهدف لانى قلت أنا مش مستعد اضحى بكم ، ولا بقواتى المسلحة ولا بشعبى أمام امريكا .. لانى لأحارب امريكا ، ولكن بأدائكم تحقق جميع أهداف المعركة بفض الاشتباك الثانى وخرج الاسرائيليين .. عادوا خلف المضايق .. وده كان هدف المعركة كله وما احتجناش لمعركة .. ده اداؤكم ياولادى .. فتحت قناة السويس اللى فى يوم من الأيام قعدوا على الشط ونزلوا استحموا فيها وقالوا نقسم الميه بالنص .. قمتم ياولادى وبارادتكم ، وبسلاحكم وبقوتكم فتحتم قنالكم كتعبير عن انتصاركم وانتصار ارادتكم .. نتيجة للديمقراطية الكاملة.. للبناء الديمقراطى الكامل .. ولا عودة الى الوراء أبدا فى هذا .. نتيجة الى البناء الديمقراطى الكامل تحقيقا لأهداف ثورة ٢٣ يوليو، وثورة ١٥ مايو التصحيحية .. قبل ماجى لكم ياولادى .. قبل ماجى لكم سمعتونى باتكلم فى مجلس الشعب .. أدت ثورة ٢٣ يوليو، وثورة ١٥ مايو .. أدوا واجبهم ، وبأسمكم جميعا سلمت مصر زى ماقلت مرفوعة الرايات سياسيا .. العالم كله اليوم ينظر لمصر ولمكان مصر مشدود كله الى مصر بعد ماكانت علاقاتنا مقطوعة حتى مع اشقائنا العرب .. ومع الدول الأخرى .. اليوم عادت علاقاتنا الى صورتها الطبيعية لكى تحتل مصر مكانها فى عالم اليوم وليس فقط كقلب لأمتها العربية ، وانما كقوة من القوى التى يحسب حسابها فى موازين عالم اليوم عادت الحمد لله بفضل عملكم وبفضل الصبر اللى تحمله شعبنا فى السنوات الماضية وانا باعمل وباواجه الرزالات من البعض فى أوقات كثيرة ولكن انا كنت دائما مؤمن والحمد لله ثبت اننى على حق .. مؤمن ان القاعدة العريضة من شعبنا سليمة قوية متماسكة صامدة صابرة مؤمنة لا تسلم ابدا ولا تتفشى فيها أبدا أى روح انهزامية

اليوم بنعود .. سلمنا الأمانة للشعب : سياسيا ادى علاقاتنا مع العالم كله .. كان آخر شيء هي المعاهدة اللي بيننا وبين الاتحاد السوفييتى وكان لابد وانا باسلم الأمانة أن اضع تقريراً عن حقيقة هذه العلاقات أمام الشعب وتركت لمجلس الشعب أن يتخذ قراره ، واتخذ قراره فى هذا .. نحن لا نريد أن نعاضى أحد .. ولكننا كما قلت من قبل كما بدأنا ثورة ٢٣ يوليو، وانهينا بثورة ١٥ مايو.. نصادق من يصادقنا ، ونعاضى من يعاضينا .. انا حزنت أشد الحزن .. حزنت أشد الحزن لان ثلاث سنوات كاملة بعد هزيمة ٦٧ من ٦٧ الى ٧٠ ثلاث سنوات كاملة سمعتمونى وأنا باقول كنت باستقبل السفير السوفييتى كل يوم اثنين فى بيتى .. لثلاث سنوات كاملة ، وبنحل علشان نواصل العلاقات أحسن مايمكن زيارتى الأربع للاتحاد السوفييتى فى اقل من سنة وانا رئيس للجمهورية بعد ولايتى ..دفاعى عن الاتحاد السوفييتى امام مجلس الشعب فى فبراير ٧٢ وقت ماكان الشعب المصرى كله يحمل على الاتحاد السوفييتى أمجد دفاع .. حتى فى هذه الحقبة قلت للرسميين والمسئولين اللى بيعملوا معى من يريد أن يتعاون معى فليكن ومن لايريد يتفضل لانه لا أقبل فى هذه المرحلة اى اهتزاز ده كان كله علشان احاول اغطى موقف الاتحاد السوفييتى لاننا ماخناش غاويين عداوة حد .. لا .. احنا بس غاويين كرامتنا وغاويين ارادتنا الحرة المستقلة .. ليه لان دى اللى كافحنا من اجلها ، ولا يمكن مهما كانت الضغوط .. انا تعرضت فى الفترة الماضية وخاصة بعد وقف اطلاق النار .. تعرضت ولازلت اتعرض الى هذا اليوم لأعنف الضغوط من الاتحاد السوفييتى ومن بعض المحاور اللى بيحاول يوجدوا فى العالم العربى .. ضغط عسكري بعدم امدادى بقطع الغيار والسلاح اللى فقدته واللى طلبت اشتريه بالثمن .. استعواض الخسائر .. التطوير .. تطوير القوات المسلحة لان احنا لا نقنع اننا نقعد كده ونتخلف .. لا .. انا الحيطه دى كسرناها .. حطماناها من زمان بتحطيم جدار الانهزامية .. بتحطيم خرافة اسرائيل حطماناها أيضا كل قيود كانت على حركتنا . وضغط عسكري بيستهدف انه فى سنة ، فى سنة ونصف يصبح السلاح اللى عندى خردة لأن مالوش قطع غيار .. ولعبة زى لعبة

القط والفار زى ماقلت لكم. باتعرض أيضا لضغط اقتصادى بيرفض جدولة الديون .. مش بيرفض جدولة الديون ده بيرفض يعمل معايا اتفاق تجارى مع ان مصانعى انا جايبها منه .. بيرفض يعمل معايا اتفاق تجارى والى هذه اللحظة اتفاق سنة ٧٦ لم يوقع مع أن العادة كنا دائما بنعمل اتفاقات خمس سنين بخمس سنين .. وطلبنا هذا .. باتعرض لكل هذه الضغوط .. لن تغير فى مسيرتنا شيء .. ونحمد الله اننا اليوم فى علاقات متوازنة مع الكل والكل يأتى الى مصر .. والكل يعرف مكانة مصر من أمتها العربية ومن منطقتنا اللى احنا عايشين فيها . عسكريا كان ادواكم رائع .. انا فى غير حاجة انه اتحدث عنه يا ولادى لان انا سيبت الآخرين يتحدثوا عن أدائكم . اقتصاديا زى ما انتوا شايفين بنتعرض اليوم لأزمة اقتصادية عنيفة ولكن فى رحلتى الاخيرة الى البلاد العربية استطعنا أن نصل الى اتفاق لكى نحل مشكلة المتاعب الاقتصادية المتراكمة منذ سنة ٦٢ استطعنا ان احنا نتفق على ايجاد صندوق من اخواننا العرب وأيضا من أصدقائنا فى جميع انحاء العالم علشان تقويم اقتصادنا الى الآن لكى لانعود مرة اخرى تحت تهديد حد أو نواجه أى كارثة أو أى شيء فى وقت من الاوقات مانكونش عاملين حسابها بنستعين فى هذا بخبراء عالميين مع خبرائنا المصريين مع اخواننا العرب وان شاء الله فى بحر شهرين هاتكون هذه الخطة جاهزة وهاتعرض على مجلس الشعب وهاسمعها الشعب كله علشان يعرف حقيقة اقتصادنا كان اية . اللى عايز اقله انه سياسيا وعسكريا واقتصاديا الأمانة بنسلمها بشرف للشعب صاحب الأمانة

يوما ماقلت فى مجلس الشعب علشان عملية المنابر سلمت الأمانة لصاحبها الأمانة عسكريا، وسياسيا ، واقتصاديا ، ونصت ايضا على دور القوات المسلحة اللى كانت طليعة الشعب يوم ٢٢ يوليو فى المساء فى ثورته .. لتعود القوات المسلحة كما كانت دائما سياج الدفاع عن الوطن وحماية الشرعية الدستورية طالما الدستور قائم فالقوات المسلحة منصرفة الى واجبها العسكرى فقط .. وليس إلا .. فى الممارسة الديمقراطية بنقول للشعب اتفضل من أوسع الابواب ادخل لان شعبنا بحق تحمل

الإمانة .. شعبنا بحق عانى قبل الهزيمة فى ٦٧ وبعد الهزيمة فى ٦٧ شعبنا عانى الكثير .. مانتوش فى حاجة الى أن أقول اهدرت كرامة الانسان ماكانش فيه انسان آمن على نفسه ولا على اولاده ولا على حياته ولا على بيته .. اليوم زى مايقول بنسلم الامانة .. وبنسلمها واحنا جميعا نفخر بأنها صفحة سياسية وعسكريا واقتصاديا ، وسمعة فى العالم ، ومكانة بنسلمها أمانة قوية نظيفة ناصعة البياض وبنقول لشعبنا يمضى فى امانة وفى حب نحو أهدافه ونحوبناء رخاؤه فى الديمقراطية الكاملة بحتمية الحل الاشتراكي وحقوق العمال والفلاحين .. بيسعدنى أعظم سعادة وانا فلاح انه ماعادتشى كلمة فلاح شتيمه النهاردة كل واحد بده ينسب الى انه يكون فلاح .. كانت زمان كلمة فلاح شتيمه .. لا هوده أصل البلد. اليوم بنسلم الأمانة يا اولادى بشرف ناصعة البياض .. دولة مؤسسات لا مجال فيها ولاعودة أبدا لحكم الفرد وانما حكم المؤسسات .. بنسلم البلد بالحب وبنلغى الحقد والكراهية ولو انه لأزم اعترف أمامكم ان احنا استطعنا ان ننتصر واستطعتم ياأبنائى أن تحققوا أروع أداء عسكري فى التاريخ الحديث عسكريا .. استطعنا ان نصبح فى عالم اليوم مصر مركز ثقل بين المراكز التى يحسب حسابها حتى عند الكبار عندما يجروا حساباتهم .. اقتصاديا زى ما حكيت لكم كل هذا استطعنا نعمله لكن لازم أقول امامكم يا اولادى انه لازال قدامى جبل من الحقد عايز يعود بنا الى تصفية الحسابات والى اذكاء العداوة والحسد والحقد بين الناس وبين الطبقات وحقد اعمى .. حقد مرير لسه امامى .. استطعنا ان نجز اللى فات ده كله ده لازم ننجزه ان شاء الله واحنا وقد سلمنا الامانة لكن لازم ايضا نخلصها تماما من هذا الحقد حتى تكون الدولة دولة مؤسسات كما هى قائمة الآن .. سيادة القانون بتسوى ما بين الكبير والصغير والجميع سواء .. السلطة التنفيذية بتؤدى واجبها فى هذه المرحلة لاعادة البناء .. السلطة التشريعية كما شفتوها فى المرحلة الماضية بتؤدى واجبها ولوبعض التجاوز لكن من السهل جدا ان احنا نصلح مسيرتنا من آن الى آخر .. السلطة القضائية عادت لها كرامتها ، وحرمتها وكاد ليكون لكل انسان على أرض مصر قاضيه .. ولم يعد ابدا يؤخذ بتقارير واقفلت

المعتقلات منذ خمس سنوات ولن تفتح مرة اخرى ابدا ان شاء الله .. قواتنا المسلحة عادت قواتنا المسلحة الى مكانها بروعة فى بلدها وفى امتها العربية ، وامام العالم اجمع معارككم ستظل الى عشرات السنين المقبلة تدرس يا بنائى فى جميع كليات الحرب فى اوروبا وامريكا واسيا وافريقيا وفى كل مكان . ادينا ده كله وبنؤديه وبنحافظ عليه وبنقوم الأداء اذا حصل تجاوز فى الصحافة لأزم نقومه مش بالغاء حرية الصحافة ، وانما بالغاء الأسباب اللى ادت الى هذا التجاوز .. اذا حصل إى شيء بروح العائلة بنحلها فى داخلنا .. رئيس الجمهورية بيمثل رأس العائلة وحكم بين الجميع وأخ وأب للجميع .. بقية المؤسسات بتؤدى دورها الدستورى وهنالأزم اقول البعض بيظن ان هذا الكلام بيقضى اوبينال من الاتحاد الاشتراكى .. لا .. الاتحاد الاشتراكى ادى دوره وانا باقول هذا .. نترك مايقوله اصحاب الحسابات القديمة واصحاب الاحقاد والحزبات نترك كل هذا .. الاتحاد الاشتراكى يؤدى دوره .. انا لانسى ابدا انه قبل المعركة وفى اغسطس ٧٣ كنت فى برج العرب وجمعت امناء الاتحاد الاشتراكى جميعا فى برج العرب فى اغسطس ٧٣ شهرين قبل المعركة وقلت لهم انا داخل معركة وجهزوا نفسكم .. ماحدث سمع كلمة ابدا وكان الشعب اثناء المعركة على ارووع صورة الاتحاد الاشتراكى ادى دوره .. وادى دوره فى كل الازمات اللى احنا تعرضنا لها لكن اليوم احنا تخطينا هذا الى الممارسة المفتوحة اكثر لانه بلاشك الاتحاد الاشتراكى كان سمة من سمات التنظيم الواحد نظريةالتحالف شيء أما التنظيم الواحد ده شيء آخر التحالف لا مناقشة فيه لارجعة فيه .. التحالف العمال الفلاحين .. والجنود والمتقنين والرأسمالية الوطنية والوحدة الوطنية لا رجعة فى هذا ولا مناقشة فى هذا ٥٠ % للعمال والفلاحين لا مناقشة فى هذا أبدا تحت اى ظرف .. التحالف قائم انما هى نظرية الممارسة ما يحدث اليوم هوتطوير للممارسة الديمقراطية .. وبعد ما كانت بتتسم بسمة التنظيم الواحد أو الحزب الواحد لا وانا قلت فى ورقة اكتوبر انى لا أقبل أبدا الحزب ولا تعدد الاحزاب ندخل عليه كده بل نبدأ بالمنابر مانقفرش الى الظلام والاحزاب أو التنظيمات

السياسية لا تقوم بقرار من احد وانما تقوم نتيجة الممارسة ونتيجة المرحلة التاريخية
اللى بيمر بها الشعب وبتطالب بأهداف هذا الشعب فى هذه المرحلة والمراحل التى
تليها

احنا مفتوحين العقل والقلب وكل شيء لا نهاجم احد نرحب بصدائة الكل ولكن
سنظل دائما نصادق من يصادقنا ونعادي من يعاديننا فى عالمنا العربى الامر بيختلف
فى عالمنا العربى حتى اللى بيعاديننا ما بفتحش معاه معركة أبدا .. اخواتنا العرب
عارفين مكاننا منهم فى القلب وعارفين مكانة شعب مصر واداء مصر ودور مصر
عبر التاريخ والى ان تقوم الساعة لن ينال منها حد لا بحركات ولا بتهريج ولا
بمزادات ولا بمناظر ابدا محدش يقدر ينال من مكانتها علشان كده ردينا على اخواننا
العرب ان احنا التصنيف اياه اللى حصل واتمرقنا بسببه رجعى وتقدمى والكلام ده
واللى لسه الاتحاد السوفييتى بيصنف العرب بيه احنا بنرفضه احنا بنقول نحن عرب
فقط نحن عرب نحن عرب عرب دى فوق تقدمى وفوق رجعى وفوق كل التعابير
اللى بيقولوها نحن عرب وثبت يوم ما اتلمينا عليه فى وحدة كعرب وبذلت انا سنتين
جهدا فى هذا ورغم اللى بيزايدوا النهاردة علشان التضامن العربى فى سوريا
بيتكلموا عن التضامن العربى انا قعدت سنتين على ما عملت من العرب أسرة زى ما
عملت من مصر أسرة علشان كده حاربنا ولما حاربتهم يا اولادى وأديتوا اداءكم الرائع
دخلت امتكم العربية وراكم بسلاح البترول ولأول مرة تفاجئوا الغرب والحضارة
الغربية كلها تواجه بالتهديد الحقيقى بارادة رجل واحد هذا الرجل هونحن العرب مش
مستعدين نفرط فى هذا ولانه لسه الاتحاد السوفييتى بيحاول ينشأ المحاور وتحت اسم
تقدمى ورجعى ابدا فى امتنا العربية نحن عرب عرب لانه جينا فى وقت الشدة
لقيناهم ورأنا فى وقت الشدة لقيناهم ورأنا فى وقت الشدة أزرونا سمعتونى باحكى لما
جمعت مجلس الامن القومى قبل ما اجمع المجلس الأعلى للقوات المسلحة جمعت
المجلس الأعلى للقوات المسلحة .. فى آخر مرة قبل المعركة كان يوم ٥ رمضان
وده كان المجلس وعلى مدى ست ساعات قادتكم فى جميع فروع القوات المسلحة

شرحوا الخطة وكل واحد كان عارف التانى حيعمل اية وطبقت على التلقين بنهائى
يوم ٥ رمضان يوم ٧ وقعت امر القتال يوم ٤ اجتمعت مع مجلس الأمن القومى
وسمعتونى قلت هذا وعلى مدى ساعات طويلة سمعت كلامهم وفى الاخر قلت لهم
اقتصاد مصر وصل الى درجة الصفر اى ان التزاماتى فى اخر السنة اللى فاضل
عليها شهرين مش عندى رغيث العيش للشعب المصرى سنة ٧٤ مش عندى ومع
ذلك ما خفناش ابدأ انا ما خفتش ودخلنا المعركة واتخذت القرار هبوا اخواننا العرب
لنجدتنا كلهم ولمساعدتنا واشكر لهم جميعا الحقيقة ما عدا انسان مريض اللى
هو القذافى لانه حاقد لا حرج عليه فى امتنا العربية نحن نرفض تصنيف الدول
ونرفض محاور تقيمها اى قوى من خارج المنطقة العربية أو أى دولة عربية
المحاور اللى بيقيمها الاتحاد السوفيتى النهاردة وقال عنها برجينييف فى خطبته نحن
نرفض سياسة المحاور ونحن نرفض ايضا مش بس الاتحاد السوفيتى ونرفض أى
بلد عربى يبدأ فى سياسة محاور احنا احتلينا مكاننا كقوة سادسة اليوم اللى يخرج
علينا حينزل من هذا المجال لكن كلنا حنفضل فوق وهو اللى حينزل تحت وما عادتش
الامة العربية تقهر ولا تنتازل عن مكانها ابدأ لان الامة العربية مش الاغلبية يكاد ٩٩
% هم العقلاء و ١% هم المرضى والمزايدين .. وبعدين اللى بينشيء محاور ده
الاتحاد السوفيتى بيقول انه واقف مع القضية العربية بصلابة وكلام كبير ، وصلابة
والموقف الصلب طيب الموقف الصلب ده فيه قضية عربية فى سوريا وما فيش قضية
عربية فى مصر ما مصر هنا معروفة هى ميزان المعركة فى هذه المنطقة شاء
الاتحاد السوفيتى أو لم يشاء .. شاءت امريكا اولم تشاء شاءت اسرائيل اولم تشاء
الميزان هو مصر هنا مش أى حته تانية بنرفض سياسة المحاور انا حكيت لآخوانكم
فى الجيش الثانى على معركة ٥٦ لما تبين لنا انها مؤامرة جمال عبد الناصر بعث
مباشرة لسوريا ولالأردن قال لهم أوعوا تدخلوا المعركة ومنعهم من دخول المعركة
وواجهنا احنا فى ٥٦ بقواتنا المسلحة وواجهنا المؤامرات الثلاثية بتاعة انجلترا ايدن
وفرنسا جى موليه واسرائيل بن جوريون واجهناها وخرجنا منها منتصرين سياسيا

ولكن منعنا سوريا ومنعنا الأردن النهاردة حاقول لكم سر فى الحرب اللى فاتت
اتخذنا القرار انا والرئيس حافظ الاسد لم نختار الاردن لما جه الملك حسين زار
القاهرة قبل المعركة بشوية وكانت علاقتنا الدبلوماسية مقطوعة اعدت العلاقات فوراً
لانه لا يمكن أبداً معركة وعلاقتى مقطوعة مع واحد زميلى فى الأمة العربية لهذه
الاسباب اعدت علاقتنا بالاردن وماقلاش للملك حسين على المعركة ،وبدأنا المعركة
فى ٦ اكتوبر والملك حسين مايعرفش وذهل من اللى حصل بس فوجيء الملك حسين
انه بعد ايام قليلة سوريا بتطلب انه يخش يهجم من عنده فبعث لى بيسألنى وعايزينه
ينزل يهجم من الاغوار خش على نهر الاردن فبعث لى الملك حسين وبيشكومن هذا
الوضع وكان منطقى جدا احنا ما اخطرناش الرجل بخطتنا ولا ادنالوش علم مسبق
بحاجة وما عندوش دفاع جوى فأنا وافقت الاردن وقلت لهم لا انا فعلا فى تقديرى
ان فى وضعكم الحالى من السهل جدا ان اليهود يضربوكم ويخشوا على عمان على
طول وانفذتهم من مزايده سوريا النهاردة الملك حسين هو حافظ الاسد عاملين حلف
طيب حلف كويس لان الجبهة الأردنية والسورية جبهة واحدة واحنا عسكريين
وسياسيين لازم نفهم هذا اللى مننا عسكري أو سياسى لازم يفهم ان الجبهة السورية
والجبهة الأردنية جبهة واحدة بس ما تبقاش الطبخة على حساب حد تانى على حساب
الفلسطينيين زى ما هو ماشى النهاردة وزى ما حيتكشف
النهاردة الملك حسين ماشى وراء حزب البعث السورى وما عندناش فى هذا اى
حاجة ولن تزودوا وتتقصوا عندنا لن تغير فى الاوضاع حاجة ولن تغير فى المنطقة
العربية شيء ابدا ، انا حاذكر حادثة انتم لكم علاقة بيها لما حدثت الثغرة هنا انا
عارف ان دى معركة تليفزيونية واتقال فى معاهد الدارسات الاستراتيجية فى فرنسا
وانجلترا وكثير من الاماكن ان دى كانت معركة مسرحية بينقذوا ماء الوجه .. لما
حصلت الثغرة قلت والله انا اخليهم يذوقوا طعم الثغرة برضه عندهم جبت عشرة
ضباط من أكفأ الضباط اللى عندى بتوع القوات الخاصة اللى لهم خبرة فى فلسطين
شبرا شبرا وركبتهم طيارة كوميت وبعثتهم الى الاردن برسالة منى الى الملك حسين

وقلت له فى هذه الرسالة.. انتقى من تشاء من المقاومة الفلسطينية ممن ترضى عنهم
انت لان انا عارف التاريخ بينه وبين المقاومة الفلسطينية .. قلت له نقى من تشاء
وخليهم يدخلوا مع العشرة ضباط دول على اسرائيل بدون علمك على ان هذا
الموضوع لا دخل لك بيه لانى مش عايز اورطك فى حاجة .. انا كنت عايز اذوق
اسرائيل بس لمدة يوم قبل وقف اطلاق النار أو ١٢ ساعة اذوقهم ماهوطعم الثغرات
.. خاف الملك حسين ..خاف وقالوا الملك حسين خارج الاردن ٤٨ ساعة وعادوا
ولادى العشرة ضباط بعد ما كانوا فضلم قاعدين هناك . انا بحط دى قدام الأمة
العربية علشان اقول للعرب جميعا

ان مصر فى ٥٦ عرفت واجبها ومنعت سوريا والاردن انهم يدخلوا
فى معركة ٥٦ فى المعركة دى مصر عند مسئولياتها وما حبناش نورط الملك حسين
لانه لم يخطر مقدما ووقفت انا جانبه وباعلن اهوقدام العالم كله ان انا وقفت جانبه
لانى باقف جانب الحق لان احنا مش عايزين نزايد على حد وما كنتش احب ابدأ انه
زى وهومعدوش دفاع جوى يحتلوا له عمان تانى زى ما كانت سوريا طالبة منه انه
يدخل وينتحر انا باحكى علشان اقول ماهى مصر وما هومدى فهم مصر للمسئولية
العربية ومدى فهم مصر لدورها القيادى العربى مصر عندها زى ماقلت لاختاتكم
فى الجيش الثانى وفى بورسعيد مصر تستطيع ان تكون قدوة فى الحرية
والديمقراطية والبناء الداخلى اللى بتتم آخر لمسسه منه فى الأيام دى .. مين يستطيع
انه يكون قدوة هنا فى الأنظمة الثورية اللى بيقولوا عليها مين منهم يستطيع يقفل
المعتقلات خمس سنين ويقعد فى الحكم ساعة بعدها مين منهم يستطيع يدى الشعب
حريته وحرية صحافة زى اللى عندنا ويقعد ساعة فى الحكم بعدها احنا من خمس
سنين مصر قدوة تستطيع ان تكون قدوة وهى قدوة فعلا لانه اللى بنطبقه النهاردة
حرية كاملة ثورة بتصحح نفسها لما حصلت أخطاء فيها صححت نفسها وبعدين جت
قالت للشعب صاحب الامانة اتفضل الامانة اهى سياسيا وعسكريا واقتصاديا وادى
كل منا فى مكانه مفيش معتقلات من خمس سنين والى الأبد .. بناء حرية صحافة

بعد المعركة مباشرة والى الابد .. بناء ديمقراطى سليم هذه القدوة اللى تقدر تديها
مصر ومحدث من اللى بيزايدوا النهاردة من دول يقدر يديها الامر الثانى اللى عند
مصر المقدره .. من يوم ما انتهت المعركة لغاية النهاردة المبادرة اخذناها فى ايدينا ما
سبنهاش أبدا .. سياسة مصر واستراتيجية مصر قائمة على ان لا تقف القضية لحظة
اطلاقا بل تظل تدفع الى الامام ٧٤ فض الاشتباك الاول ٧٥ دخلنا فض الاشتباك
الثانى ٧٦ بنجهاز لجنيف ٧٧ عايزين نخلص الحل النهائى ان شاء الله بعد الانتخابات
الامريكية والجلاء عن سيناء بالكامل وعن الارض العربية بالكامل دى سياسة مصر
حتى الاتحاد السوفييتى بكل تصرفاته لا يستطيع انه يعارضنا فى وضعنا بتاع
السياسة الخارجية بل نحن متفقين فيها احنا الاثنتين وما يقدرش يدعى انه يوافق على
التهريج بتاع حزب البعث السورى .. ما بيدعش هذا أبدا ده تهريج اللى بيعملوه
عندنا حرية الحركة العالم كله معانا كل العالم عنده مقدرة على التحرك ومقدرة على
دفع القضية باستمرار زى ما قلت لكم وزى ما باهنيكم يا اولادى النهاردة وفى هذه
الأرض أرض السويس المجيدة صاحبة المعارك المجيدة وانا جى اهنكم بفض
الاشتباك الثانى طيب دا هو هدف معركتنا وما احتجتش انى اعمل معركة انا كان
نفسى لان دى كانت معركة التاريخ حطين لى الـ ٤٠٠ دبابة فى مكان ما يناورش
فيه ١٠٠ او ٢٠٠ دبابة لواعين وحطمتهم وفاهمين ان انا حاخاف واكش واقول دول
حاير وحو القاهرة زى ما كانوا بيذيعوا وزى ما كانوا بيحاولوا يأتروا على اعصاب
الناس بتوع زمان ابدا وانا لقيت طعم دسم تماما الـ ٤٠٠ دبابة اللى موجودين دول
كلهم وداحنا كان قدامنا القناة ووراءها ثلاثة خطوط بارليف من اول القناة للعمل فى
ساعات خدناهم طيب وانا مكنش قدامى قناة ولا حاجة يوم ما كنت حاصفى الثغرة
وحاطط الخطة وصدقت عليها يوم ٢٤ للقيادة العامة للقوات المسلحة واستعرضوها
قدامى على مدى ست ساعات وعينت سعد مأمون قائد للثغرة وتعليماتى له كانت فى
اقل وقت ممكن تصفى لى الـ ٤٠٠ دبابة دول ومفيش حاجة منهم ترجع الشرق ابدا
لا جندى ولا دبابة ولا سلاح .. اللى منعى من ده يا اولادى بصراحة كيسنجر يوم

١١ و ١٢ ديسمبر كان عندي وبأسأله عن موقف امريكا لان انا اللي طلعتني من المعركة وخالتي قبلت وقف اطلاق النار موقف امريكا ومش مستعد اضحي يا اولادى ولا بجيشي ولا بسلاحى ولا بشعبى ولا بقناطرى ومنشأتى ومصانعى انا مش مستعد اضحي أبدا لمجرد المزايدة أبدا طلعتنى امريكا من المعركة باقول سييونى اصفى الثغرة انا عايز اصفيهم فعلا ماهو موقف امريكا قال كيسنجر يؤسفنى ان احنا لأبد سندخل لانقاذ اسرائيل لانه حانعتبر ان دى ضربة للسلاح الامريكى مرة اخرى .. ولن نسمح بهذا طيب الحل قال لى الحل سياسيا اذا ما استطعتش انا أو امريكا انها تنجز لك سياسيا ابقى استغل عسكريا وفعلا انجز الاشتباك الاول ثم فض الاشتباك الثانى اللي هو يوقف عند اهداف معركتنا ابتديناها سنة ٧٣ فيما لوكملناها بالكامل

انتهت خالصناها خلاص والنهاردة احنا داخلين بقى على المرحلة الثانية الثانية مفيهاش خطوات الثانية فيها الأرض العربية سيناء كلها والأرض العربية كلها وبنستنى الامريكان على بال الانتخابات بتاعتهم ما تجرى لأن زى ما بقول امريكا ثقلى فى هذه المعركة شئنا أو لولم نشأ رضينا أو لم نرضى هى اللي بتدى اسرائيل الحياة من الزبدة للعيش للفانتوم للدبابة كلها منها العجز اللي فى الميزانية حتى هى بتأخذه اسرائيل من امريكا فاللى ينكر دور امريكا يبقى مهرج فى العالم العربى لازم نستنى لغاية ما تخلص الانتخابات بعد ذلك انا ما عنديش زى ما قلت لكم يا اولادى خطوة تانى المرحلة اللي جاية خطوة واحدة لتصفية الاحتلال الاسرائيلى فى سيناء والارض العربية كلها والوصول الى الاحتلال الاسرائيلى فى سيناء والارض العربية كلها والوصول الى السلام انا اردت انى اطوف بيكم الشوية دول لانها إنفعالات يا اولادى جت وانا قاعد معاكم على ارض السويس الحقيقة ومتأسف اذا كنت طولت عليكم انا مؤمن دائما احمد الله يا اولادى ان احنا بنجتمع النهاردة وفى كل مرة باجى لكم بيكون فيه انجاز بيكون فيه حى جديد بيقوم فى السويس بتكون القناة بتفتح باهنيكم بانسحاب اليهود الى خلف المضائق كل مرة باجيلكم فيها انجاز واحمد الله انه

مكنى من هذا ، واحمد الله انه مكنى لاعلن ثورة ٢٣ يوليويوم ٢٣ يوليوسبعة صباحا
وانى اسلمها الى الشعب مرة اخرى فى ١٤ مايو٧٦ امانة نظيفة برغم ثقل التركة
اللى انا ورثتها وانتم عارفين كلكم كيف كانت الحالة سياسيا وعسكريا واقتصاديا
برغم هذا سلمنا الامانة للشعب صاحب الامانة وبنعمل جميعا من اجل بناء مجتمع
الحب مجتمع لا مكان فيه ابدأ للحقد مجتمع العيلة الواحدة اللى كل انسان فى كل
مكان بيحس فيه بأخوة مجتمع الدولة مسئولة فيه مسئولية كاملة عن تأمين كل فرد
على ارض مصر فى المدن فى الصحارى فى البوادي فى النجوع فى كل مكان
بنصل اليه وانا فى السجن تعلمت حكمة ان عظام الاعمال لاتتم بالقوة وانما تتم
بالصبر .. علينا بالصبر ولكن عليكم يا ابنائى انتم ان لاتضيعوا لحظة واحدة تدريب
شاق مستمر باعدكم كما سمعتونى باحكى لاختكم فى الجيش الثانى ان اجيب لكم
كل مااستطيع من أسلحة مطورة ولن اسمح أبدا أن نتخلف مرة أخرى أبدا واذا تخلفنا
نحن العرب مرة أخرى ستكون القاضية .. احنا اثبتنا ذاتنا فى المعركة اللى فانت
وعاد خلاص المعركة مش مشكلة بالنسبة لنا لكن كمان لا يمكن ان يمشى العالم
واحنا واقفين واحنا وقوف أو مجمدين انا باعدكم مهما كانت الصعاب انى باوفر هذا
وباعدكم ايضا انه شعبكم لن ينسى لكم ما أدبتموه كونوا مطمئنين وكونوا عند حسن
ظنى بان تزيدوا التدريب الشاق عرق وتزيدوا العلم العسكرى تطوير واسلحتكم
تعطوها من ذاتكم زى ما اعطيتم فى اكتوبر زى ما ادبتم فى اكتوبر عشان تعوضوا
الفجوة اللى بيننا وبين الاسرائيليين عوضتوها بادائكم انتم الذاتى النفسى اداء
المصرى لازم تكونوا واثقين ان شعبكم لن ينسى لكم ما ادبتموه وما بذلتموه ،
ويطالبكم بان تكونوا على استعداد لبذل اكبر اذا اقتضى الامر ذلك والله يوفقكم
والسلام عليكم ورحمه الله وبركاته